

**Nunatsinni innarluutillit pisortat namminersortullu suliffeqarfiutaanni ajornannginnerusumik sulilersinnaanissaat aqutissiuunneqaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortat Siverth K. Heilmann aamma Knud Kristiansen, Atassut)

**Akissuteqaat**

(Inuussutissarsiornermut Aatsitassanullu Naalakkersuisoq)

**Aappassaanneerinnineq**

Aalajangiiffigisassatut siunnersuummik matuminnga peqqissaartumik suliarinnissimaneranut Inuussutissarsiornermut Ataatsimiititaliamut qujanaq.

Innarluutillit suliffeqalernissamut periarfissaqarnerulernissaat qanoq iliorluni qulakkeerneqarsinnaanersoq ersarissarlugu Naalakkersuisut suliaqassasut Ataatsimiititaliap naatsorsuutigaa. Aamma innarluutillit imaluunniit innuttaasut siusinaartumik pensionisiaqartut annikillisimasumik sulisinnaassuseqartut suliffeqarnermi eqeersimaartumik peqataalersinnaanerat eqqarsaatigalugu.

Nuna tamakkerlugu inuit 400-it missaanniittut piginnaanngorsaaqqinnermut peqataammata Ataatsimiititaliap neriulluarnartikkaa Naalakkersuisut iluarisimaarpaat, tassani Ataatsimiititaliap neriutigaa ineriartorneq taanna siunissami annertusarneqarsinnaasoq, taamaalilluni inuit amerlanerusut piginnaasaminnik pisinnaasaqarnerminnullu suliffeqarnermi atuinissamut periarfissaqalissallutik.

Suliffeqarfiit inooqataanermi inuiaqatigiinnilu akisussaaffeqarnermik kalaallit inuussutissarsiortut aallussinerat annertusiartortoq Naalakkersuisut taamatutaaq isumaqatigaa. Kiisalu inuussutissarsiortunit nammineq piumassutsimik suliniuteqarneq siunissami annertusiartortussaavoq, taamaalilluni innuttaasut sanngiinnerusut eqqarsaatigalugit suliniarnermi kivitsisussat amerlanerulissallutik.

Innarluutilinnut inuusuttunut ilinniartitaanermi suliniuteqarnerup annertusarneqartariaqarneranut, taamaalillunilu inuusuttut naleqquttumik ilinniarnissamut periarfissanik neqeroorfigineqartalernissaannut Ataatsimiititaliaq isumaqataammat Naalakkersuisut iluarisimaarpaat.

Innarluutillit pisortat namminersortullu suliffeqarfiini suliffissaqartinneqarnissaasa ajornannginnerulernissaa anguniarlugu suliniarnissaq siunertarlugu, naalakkersuisoqarfiit attuumassuteqartut kiisalu kommunini immikkoortortat innarluutilinnut, siusinaartumik pensionisialinnut, piginnaanngorsaanermut suliassaqarfinnik kiisalu ilinniartitaanermut suliassaqarfimmik isumaginnittuusut akornanni suliffeqarfiit akimorlugit suleqatigiinnissaq pisariaqartoq, eqikkaanermi Naalakkersuisut uppersarsavaat. Kiisalu suliffeqarnermi illuatungeriit akornanni ataqatigiinneq ingerlaavartumik pitsanngorsartuartaqarpoq, taamaalilluni **aamma** innarluutillit nalinginnaasumik atugassaqartitsiviusumik suliffeqalersinnaanngitsut imaluunniit suliffeqaannarsinnaanngitsut, eqaatsumik suliffissani atorfininnissamut periarfissaqalersillugit, inuussutissarsiortut inissaqartitsinerulersinneqassallutik.

Taamatut oqaaseqarlutik Naalakkersuisut aalajangiiffigisassatut siunnersuut  
akuerineqaissasoq inassutigaat.